

Library
University of Pittsburgh
Darlington Memorial Library
Class F 1030.8

Book



634

Lynn







L=107 121. 20 28, Harrisse 113.

LETTRES

ENVOIÉES

DE LA

NOVVELLE FRANCE

Au R. P. IACQVES RENAVLT Provincial de la Compagnie de Iesvs en la Province de la France,

Par le R. P. HIER. LALLEMANT Superieur des Missions de la dite Compagnie en ce nouveau Monde.



A PARIS,

Chez Sebastien Cramoisy,

Imprimeur ordinaire du Roy.

M. DC. LX.

Auec Priuilège du Roy.

7 30

3029

圣圣水



PREMIÈRE LETTRE.

De l'arriuée de Monseigneur l'Euesque de Petrée en Canada.

ON R. PERE,

Les deux vaisseaux venus cette année de France, ont changé la face de nos cœurs, & de tout le païs. Ils ont fait naistre la ioie par tout, l'vn par les heureuses nouuelles de la paix entre les deux Couronnes, l'autre par la venuë de Monseigneur l'Illustrissime et Reuerendissime Euesque de Petrée. Nostre ioie seroit entière, si les Iroquois ne la troubloient point, par la guerre

qu'ils ont renouuellée après vne fuspension d'armes de fort peu de temps, pendant laquelle on a fait l'impossible pour gagner le cœur de ces Barbares. Nos Peres ont fait trois voiages à Onnontagué pour ce suiet: ils en ont fait quatre à Agnié: ils ont parcouru toutes leurs bourgades, leurs portant par tout des paroles de paix & de salut, tâchans de leur ouurir les ieux, par les lumieres de la Foy, qu'ils ont publiée dans tout leur païs.

D'vn autre costé, pour ne point aigrir ces esprits aussi superbes que mutins, non seulement on s'est contenté d'vne legere satisfaction pour les meurtres qu'ils ont fait à Montreal; mais encore on leur a relasché ceux de leurs gens, qu'on tenoit en prison, les vns après les autres, pour traisner tousiours, &

pour differer le malheur dont nous fommes menacez: Et après diuerses ambassades faites de part & d'autre, dans lesquelles ils nous ont tousiours entretenus de mille promesses de paix, auec des serments aussi solemnellement iurez, qu'on le pouuoit esperer d'vne nation barbare; ils ont enfin repris les armes, auec plus de cruauté qu'auparavant: Ils ont dechargé leur premiere fureur fur les Trois Riuieres, où ils ont pris huit François, aufquels ils ont desia fait ressentir les effets de leur barbarie; car ils leur ont fait tomber les ongles par le feu, il leur ont coupé les doigts & les mains, les preparans par ce commencement, qui ne passe chez eux que pour des petits ieux, au feu, & aux flammes, aufquels ils les deftinent, en recompense du bon traitement fait à leurs gens, que nous auons toufiours careffez dans nos prifons, & que nous auons enfin élargis, fans leur avoir fait tort d'vn feul cheueu de la tefte.

Nous auons apris ces circonstances par vn Huron Chrestien fugitif, qui s'estant trouué dans vn party qui venoit icy en guerre, les rencontra dans les Isles de Richelieu, conduits par les Agnieronnons qui les auoient pris aux Trois Riuieres. Ie fus, disoit-il, touché de compassion, voiant le malheureux estat de ces pauvres prisonniers, & en mesme temps ie fus rauy de leurs deuotions parmy leurs fouffrances. Le foir ie les entendois chanter les Litanies de la Vierge, & le matin le Veni Creator, auec les autres prieres; Ie leur voiois leuer au ciel leurs mains tronconnées & toutes degouttantes de sang. Spectacle qui a fait fi grande impression sur l'esprit de ce bon homme, qu'il a pris enfuite la derniere resolution de quitter les Iroquois, & de se ietter entre nos mains, pour y conferver la Foy, & pour nous decouurir vne partie des desseins de l'ennemy.

Les Onnontagueronnons n'ont pas esté plus reconnoissans que les Agnieronnons: car aiant pris auffi aux Trois Riuieres trois de nos François, & deux s'estant heureusement échappez de leurs mains, le troisieme a esté assez cruellement brûlé dès fon arriuée au bourg d'Onnontagué, où peu auparauant nos Peres auoient exercé des charités imaginables enuers leurs malades, & fouffert toutes fortes de trauaux, pour les instruire, & pour leur ouurir le chemin du Ciel. Depuis peu les Iroquois ont pris encore vn autre François proche de Kebec, aprés l'auoir blessé d'vn coup de fusil: Et nous apprenons qu'ils se preparent à innonder sur nous auec vne armée au plus tard le Printemps prochain, pour enleuer quelqu'vne de nos Bourgades, & mettre la desolation dans tout le païs.

Mais quoy que toutes ces choses ne nous presagent rien que de suneste, nous ne pouuons pas douter que Dieu n'ait de hauts desseins sur ces terres, pour en tirer de la gloire, puisqu'il a releué nos esperances par le don qu'il nous a fait d'vn Prelat, aprés lequel cette Eglise naissante soûpiroit depuis vn si longtemps; c'est de Monseigneur l'Euesque de Petrée, qui arriua icy

heureusement le 16. iour de Iuin 1659. & fut receu avec les ceremonies ordinaires, comme vn ange confolateur enuoyé du Ciel, & comme vn bon Pasteur, qui vient ramasser le reste du Sang de Iesvs-Christ, avec vn genereux dessein de n'e-pargner pas le sien, et de tenter toutes les voies possibles pour la conuersion des pauures Sauvages, pour lesquels il a des tendresses dignes d'vn cœur qui les vient chercher de si loin.

Dieu luy a bien-tost fait naistre les occasions de leur faire parroitre son amour: car le propre iour de son arriuée, un enfant Huron estant venu au monde, il eut la bonté de le tenir sur les sonds de Baptesme, Et en mesme temps vn ieune homme aussi huron, malade à l'extremité, deuant reçeuoir les derniers Sacremens, il voulut s'y trouuer, & luy confacrer fes premiers foins, & fes premiers trauaux, donnant vn bel exemple à nos Sauuages, qui le virent auec admiration prosterné contre terre, proche d'vne pauure carcasse qui fentait desia la pourriture, & à qui il disposoit de ses propres mains les endroits pour les onctions sacrées. Ce fut dans ce mesme sentiment d'affection, que peu aprés fon débarquement, en donnant publiquement la Confirmation aux François dans la Paroiffe, il voulut commencer toutes les ceremonies par quelques Sauuages; ce qu'il fit auec une grande ioie, voiant à ses pieds, & impofant les mains à des peuples, qui iamais depuis la naiffance de l'Eglife n'auoient reçeu ce Sacrement. Mais sa ioie fut bien

plus grande, lorsqu'ensuite il confirma toute l'élite de nos deux Eglifes Algonkine & Huronne. Nous en auions disposez vne cinquantaine d'vne nation, & autant de l'autre, par des confessions generales. L'idée qu'auoient ces pauures gens tant de ce Sacrement, que de cely de qui ils le deuoient receuoir, leur fit faire des effots extraordinaires de deuotion l'espace de huit iours pour s'y preparer. Pendant la ceremonie, qui se fit dans l'Eglise neuue des Meres Hospitalieres, on loua Dieu en quatre langues. Les Hurons & les Algonkins chantoient à leur tour des Cantiques fpirituels, qui tirerent des larmes des ieux de quelques vns des affiftans. Monseigneur l'Euesque reuestu pontificalement, paroissoit à ces Canadois qui n'auoient iamais

rien veu de femblable comme vn Ange de Paradis, & auec tant de maiesté, que nos Sauuages ne pouuoient detacher leurs ieux de fa

personne.

Ce fut pour lors qu'il confera aussi le Baptesme avec toutes les folemnitez de l'Eglife, à vn Huron âgé de 50. ans, qui ne se comprenoit pas de ioie, & qui picquoit d'vne sainte enuie ses compatriotes, qui eussent volontiers souhaité d'estre en sa place, pour participer à vn femblable bonheur. Ce pauure homme s'estoit eschappé des mains des Iroquois par vne bienaimable prouidence, pour tomber en celles de ce grand Prelat, dont l'attouchement fit couler vne vertu secrete sur ce bon neophyte; car en luy versant sur le corps les eaux facrées, il luy toucha tellement le cœur, qu'il n'est plus reconnoissable depuis ce temps-là: il s'est comme depoüillé tous d'vn coup des mauuaises maximes, & des méchantes habitudes qu'il auoit contractées par la frequentation des Iroquois. Monseigneur l'Euesque accompagna ces ceremonies d'vn fermon fait à la portée de ces pauures gens, pour les animer à refifter courageusement aux tentations, & a supporter avec patience toutes les miseres de cette vie dans la veüe & fur l'esperance d'vne vie eternellement bien-heureuse: après quoy estans tous introduits dans la grande salle de l'Hospital, où les Religieuses auoient preparé deux longues tables bien couuertes, ils y furent bien fervis par les mains de ce mesme Prelat, pour donner aux Sauuages cette exemple d'humilité et de Charité Chrestiennes: comme Monsieur le Vicomte d'Argençon nostre Gouuerneur le fait assez souvent, seruant aux malades de ce mesme Hospital; spectacle bien agreable aux Anges tutelaires

de ce païs.

Mais comme c'est la Coustume parmy ces nations, de reconnoistre la qualité des étrangers venus de nouueau, par la magnificence des festins qu'on fait à leur occasion; nos Sauuages ne se seroient pas formé vne idée digne de Monseigneur l'Euesque, s'il ne se fust accommodé à leur façon de faire, et s'il ne les euft regalez par vn festin solemnel, lequel les aiant mis en bonne humeur, ils luy firent leurs harangues entre-mélées de leurs chansons ordinaires. Ils le complimentoient chacun en leur langue,

auec vne eloquence autant aimable que naturelle. Le premier qui harangua, fut vn des plus anciens Hurons, qui s'étendit bien amplement sur les louanges de la Foy, laquelle fait passer les mers aux plus grands hommes du monde, & leur fait encourir mille dangers, & effuiér mille fatigues, pour venir chercher des miserables. Nous ne sommes plus rien, dit-il, ô Hariouaouagui: c'est le nom qu'ils donnent à Monseigneur, & qui fignifie en leur langue, l'homme du grand affaire. Nous ne fommes plus que le debris d'vne nation florissante, qui estoit autrefois la terreur des Iroquois, & qui possedoit toute forte de richesses: ce que tu vois n'est que la carcasse d'vn grand peuple, dont l'Iroquois a rongé toute la chair, & qui s'efforce d'en

fucer iufques à la moüelle. Quels attraits peux-tu trouuer dans nos miseres? Comment te laisses-tu charmer par ce reste de charogne viuante, pour venir de si loin prendre part à vn si pitoiable estat auquel tu nous vois? Il faut bien que la Foy, qui opère ces merueilles, soit telle qu'on nous l'a publiée, il y a plus de trente ans. Ta presence seule, quant tu nous dirois mot, nous parle assez haut pour elle, & pour nous confirmer dans les sentimens que nous en auons.

Mais si tu veux auoir un peuple chrestien, il saut detruire l'infidele: & scache que si tu peux obtenir de la France main-sorte pour humilier l'Iroquois, qui vient à nous la gueule beante pour engloutir le reste de ton peuple comme dans un prosond abime; scache,

dis-ie, que par la perte de deux ou trois bourgades de ces ennemis, tu te fais un grand chemin à des terres immenses et à des nations nombreuses, qui te tendent les bras, & qui ne soûpirent qu'aprés les lumieres de la Foy. Courage donc, ô Rarionaouagni, fais viure tes pauures enfans, qui sont aux abois. De nostre vie depend celle d'vne infinité de peuples : mais notre vie depend de la mort des Iroquois.

Ce discours dit avec chaleur estoit d'autant plus touchant, qu'il representoit naiuement les derniers soûpirs d'une nation mourante. La harangue que fit ensuite vn Capitaine Algonkin, ne sut pas moins

pathetique.

Ie m'en fouviens, dit-il en comptant par ses doights, il y a vingttrois ans que le Pere le Ieune en nous iettant les premieres semences de la Foy, nous affeura que nous verrions un iour un grand Homme, qui deuoit auoir toufiours les ïeux ouuerts (c'est ainsi qu'il nous le nommoit) & dont les mains feroient si puissantes, que du seul attouchement elles inspireroient vne force indomptable à nos cœurs, contre les efforts de tous les Demons. Ie ne fcay s'il y comprenoit les Iroquois: si cela est, c'est à present que la Foy va triompher par tout: elle ne trouuera plus d'obstacle, qui l'empesche de percer le plus profond de nos forests, & d'aller chercher à trois & quatre cents lieues d'cy les nations qui nous font confederées, au païs desquelles cet ennemy commun nous bouche le passage. Il adiouta tout plein d'autres choses, qui témoignoient l'eftime que luy et tous ceux de ces terres faisoient du grand pouuoir qu'à l'impression des mains: ce qu'ils se sont si bien persuadez, que les soldats allant en guerre contre l'Iroquois, auparauant que de partir vont prendre la benediction de Monseigneur l'Euesque, et la reçoiuent comme vn bon presage, auec grande consiance d'en estre puissamment fortifiez dans la guerre qu'ils entreprennent contre l'ennemy de la Foy et du pais.

Les François ne prennent pas moins de part que les Sauuages dans ce bonheur public : ils le publient affez eux-mêmes, fans qu'il foit befoin que ie vous en écriue; & ie ne doute point que toutes les lettres qui feront enuoiées en France, n'en faffent l'eloge. Ie diray feulement ce mot, que iamais le Ca-

nada ne pourra reconoiftre les immenses obligations qu'il a à nôtre incomparable Reine, non feulement de l'amour tousiours honoré de son affection, comme sa Maiesté l'a bien fait paroistre en mille rencontres; mais furtout d'auoir comblé tous ses bien-faits par le plus precieux de tous ceux qu'elle pût faire, en luy procurant vn tel Pasteur. Cette grace, cette faueur & ce riche present a tant d'approbation, que tous le monde, François & Sauages, Ecclefiastiques & Laïques, ont tout fuiet de s'en louer, & d'esperer que Dieu conseruera vn païs, qui est pourueu d'vne si fainte & fi forte protection. C'est ce que nous nous promettons fur tout, estant assistez des prieres des gens de biens, & des faints Sacrifices de vostre Reuerence, ausquels

ie me recommande de tout mon cœur.

A Kebec ce 12 de Septemb. 1659.

SECONDE LETTRE.

Des Eglises Algonkine & Huronne.

MON R. PERE,

I'ai mandé à V. R. la ioie vniuerfelle qu'a reçeu ce païs, par la venüe de Monfeigneur l'Euefque de Petrée; mais ie vous auoüe que la guerre des Iroquois nous en détrempe bien la douceur, & ne nous permet pas de goufter à nostre aise, le bien que nous possedons: ce qui nous console, c'est que le zele de ce genereux Prelat, n'a point de

bornes; il pense que ce seroit peu, d'auoir passé les mers, s'il ne trauerfoit aussi nos grandes forests, par le moyen des Ouuriers Euangeliques, qu'il a dessein d'enuoier iusques aux nations, dont à peine fcauons-nous les noms, pour y chercher tant de pauures brebis égarées, & pour les ranger au nombre de son cher troupeau; c'est à quoy il fe prepare, nonobstant la guerre des Iroquois: il pretend bien faire en ce nouueau monde, ce qui fe pratique en l'ancien; ie veux dire, que comme l'on fait couler à la derobée des Predicateurs dans les autres Eglises persécutées, ainsi desire-t-il ietter de nos Peres, parmy les premieres bandes des Sauuages qui viendront icy bas, pour remonter auec eux en leur pais, afin que malgré l'Enfer & les De-

mons, ils convient ces pauvres peuples d'entrer dans le Roïaume de Dieu, & de prendre part à la Beatitude, à laquelle ils sont predestinez. Ce font des desseins dignes d'vn courage plein de zele pour la gloire de Dieu, et aprés lesquels nos Peres foûpirent iour & nuit, brûlant d'vn desir d'estre de ces heureux exposez, non pas à l'auanture, mais à la Prouidence diuine, qui tirera tousiours sa gloire, ou de leurs trauaux, s'ils arriuent jamais à ces terres de promission; ou de leur mort, comme elle a fait de celle des autres Peres, qui ont esté tuéz par les Iroquois en vne semblable entreprise. En attendant cet heureux moment, qui ne viendra que trop tard, felon leurs fouhaits, les vns fe preparent à cette glorieuse expédition par l'ètude des langues, sans lesquelles on ne peut rien faire pour le falut des Sauuages; les autres s'occupent à cultiuer les deux Eglises Algonkine & Huronne, que la crainte des ennemis referre auprés de nous, leur donnant la commodité de s'acquitter de tous les deuoirs des meilleurs Chrestiens.

Ceux qui font obligez de s'écarter dans les terres pour la chaffe, fe fouuiennent bien des inftructions qu'on leur donne icy: ils font fouuent vne Eglife du coin d'vn bois, d'ou leurs deuotions penetrent auffi bien le Ciel, que de ces grands Temples, où les prieres fe font avec tant d'appareil; s'ils pouuoient mener auec eux, à qui fe reconcilier dans les dangers, ils s'y tiendroient auec bien plus d'affeurance.

C'est ce qui mit bien en peine

vne bonne Chrestienne Algonkine, nommée Cecile Kouekoueaté, laquelle estant tombé malade dans le milieu des bois, & fe voiant à l'extremité, sans se pouuoir confesfer, creut qu'elle y fupplieroit en quelque façon, par vn pefent de Caftor, qu'elle legua à l'Eglise des Trois-Rivières, donnant ordre à ses parents d'y aller en diligence aprés fa mort, & d'y faire fon present, au lieu de sa confession. Aussi-tost qu'elle eut expiré, ils se haterent de fe rendre aux Trois Rivieres dans l'apprehension que leur parente ne fust en peine en l'autre monde. Estant arrivez, ils s'addresserent au Pere qui a foin des Sauuages, & luy dirent: Robe Noire, ecoute la voix des morts, & non pas celle des viuans; ce n'est pas nous qui te parlons, c'est vne defunte, qui a

enfermé sa voix dans ce paquet, auant que de mourir: elle luy a donné charge de te declarer tous ses pechez, puisqu'elle ne l'a pû faire de bouche; vostre écriture vous fait parler aux absens; elle pretend faire par ces Caftors, ce que vous faites par vos papiers. Il y a quinze jours qu'elle est morte; c'est Cecile Kouekoueaté; helas, qu'elle aura souffert sur le chemin de Paradis! Faites donc au plustost que son âme soit bien traitée dans toutes les cabanes, por où elle paffera, & qu'arriuant au Ciel, on ne la fasse pas attendre à la porte; mais qu'on la reçoiue comme vne personne qui a vescu dans la Foy, & qui est morte dans le desir du Paradis. Ces bonnes gens n'estant pas encore instruits, ni baptisez, méloient leurs fables avec nos veritéz.

Vne autre fois, vn de nos plus confiderables Algonkins, estant furpris d'vne espece de paralysie auec des conuulfions extraordinaires, & des contorsions de nerfs, qui le mettoient hors d'esperance de pouuoir gagner Kebec, d'où il estoit eloigné de quinze à vingt lieües, depesche, dans cette extremité vn des fiens, pour nous en porter la nouuelle, & pour nous folliciter de prier Dieu pour luy. Ie ne scay pas fi ses prieres ou les nostres, ou bien si les vnes & les autres iointes ensemble, luy rendirent la fanté, mais il a depuis affeuré, après auoir receu le S. Sacrement, qu'il se trouua guery tout d'vn coup, & que ses forces furent si soudainement rétablies, qu'il ne peut, qu'il ne l'attribuë à vn effet tout miraculeux. Les derniers Sacrement operent fi fouuent en eux de femblables merueilles, qu'vne des choses qu'ils demandent auec plus distance, est la fainte communion, sur tout quand ils sont faiss de quelque violente maladie; car ils trouuent d'ordinaire la fanté dans ce Pain celeste, qui est souuent pour leur corps & pour leur ame vn vray Pain de vie.

Nous auons perdu deux de nos bonnes Chrestiennes, dit le Pere qui a le soin de l'Eglise Huronne, l'vne desquelle, nommée Cecile Garenhatsi, auoit demeuré deux ans chez les Meres Vrsulines, où elle auoit pris l'esprit d'vne devotion très-rare, qu'elle a conseruée iusques à la mort; chose assez ordinaire à celles qui ont le bonheur d'estre eleuées dans ce Seminaire de piété. Nostre Cecile donc estant aux abois, son Consesseur luy

demanda si elle n'auoit pas de regret de mourir; hélas! mon Père, luy dit-elle, i'aurois grand tort de craindre la mort, & de ne la pas desirer, puisqu'en me tirant de ce monde, elle me retirera des occafions d'offenser Dieu. Il est vray que i'espère bien, que toutes mes confessions ont effacé mes pechez, mais elles ne m'ont pas rendue impeccable: mais confolation est, que ie la feray après cette miserable vie; & puisque l'amour n'est pas assez grand en moy, pour faire ce que la mort y fera, à la bonne heure, que la mort vienne pour me deliurer en mesme temps de la seruitude de ce corps, & de celle du péché.

Le mary de cette bonne femme eftoit pour lors à la chaffe, bien auant dans les bois, au moment qu'elle expira : elle luy apparut, &

luy dit le dernier Adieu, luy recommandant fur tout, de ne iamais quitter la prière qu'avec la vie. Cet homme, à ce spectacle, se tourna vers fon compagnon de chasse, luy raconta fa vision, & la mort de sa femme; & aussi tost il se met en chemin pour retourner à Kebec. A fon arriuée il apprend que sa femme auoit expiré iustement dans les mesmes circonstances du temps, auquel elle s'estoit fait voir à luy. Le changement de cet homme, & la ferueur iointe à la constance qu'il garde depuis cet accident, aux prieres publiques & particulieres, nous fait croire qu'il s'est passé en ce rencontre quelque chose de bien extraordinaire.

La seconde femme, que la mort nous a enleué cet hyver, auoit pensé mourir quelques années au-

parauant de la main des Iroquois: ces barbares l'aiant rencontrée, luy arracherent la peau de la teste, la laissant pour morte sur la place; depuis ce temps-là elle n'a fait que mener vne vie languissante, mais toûiours si feruente à la priere, qu'elle n'a iamais manqué de se trouuer tous les matins, & tous les foirs à la Chapelle, nonobstant sa grande foiblesse; ce qu'elle a gardé exactement, iusqu'à ce qu'vn iour, au retour de l'Eglise ou elle s'estoit transportée auec vne maladie mortelle, elle fut obligée de s'aliter, & peu aprés elle mourut faintement, se trouuant au bout de sa vie auant la fin de ses prieres. La constance de cette pauure femme fera un grand reproche à la delicatesse de ces dames, qui pour de legeres incommoditez se dispensent aisement de leurs deuotions. Et la patience d'vn ieune Sauuage, condamnera ceux, qui s'emportent à tant de murmures, & à tant de plaintes pour vne goutte, pour vn mal de dents, ou pour quelques autres incommoditez. Cet homme deuenu impotent depuis cinq ans, estoit gisant non pas sur la plume ny fur le duuet, mais fur vne écorce, qui luy feruoit de paillasse & de matelas; il souffroit auec vne patience de Iob, dans toutes les parties de fon corps. Croiriezvous bien, que la grace a tellement operé dans ce coeur Sauuage, que non feulement on ne l'a pas entendu se plaindre; mais mesme il a declaré, que iamais il ne luy est venu en pensée de souhaiter l'usage de ses membres, puisque son ame fe trouuoit mieux du miferable estat de son corps, & que son falut

falut se faisoit auec bien plus d'asseurance, disant que c'estoit bien affez qu'il euft l'vsage de ses doigts & de fa langue, pour dire fon Chapelet, qui faisoit vne grande occupation de sa iournée. Dieu l'a bien recompensé; car il a heureufement finy fes iours, & rendu fon ame entre les bras de Monseigneur l'Euesque de Petrée. Voila quelques-vnes des particularités, que i'ai apprifes fur ces deux Eglifes affligées, qui ne sont plus que le debris de deux Eglises souffrantes, et qui seroient la semence d'vn grand peuple Chrestien, si l'Iroquois ne continuoit point de les exterminer. Ie les recommande, & moy aussi, aux Saints Sacrifices de vostre Reverence.

A Kebec ce 10 d'octobre 1659.

TROISIÈME LETTRE.

De la Mission de l'Acadie.

MON R. PERE,

Voicy vne troisième Lettre que i'écris à V. R. pour l'informer de ce qui s'est passé dans la Mission de l'Acadie, où trois de nos Pères tra-uaillent à la conversion des Sau-uages de cette coste, & au salut des François qui y sont habituez.

L'Acadie est cette partie de la Nouvelle France, qui regarde la mer, & qui s'étend depuis la Nouvelle Angleterre iusqu'à Gaspé, où proprement se rencontre l'entrée du grand fleuve de S. Laurens. Cette étendüe de païs, qui est bien de

trois cens lieuës, porte un mesme nom, n'aiant qu'vne mesme langue.

Les Anglois ont vsurpé toutes les costes de l'Orient, depuis Canceau iufqu'à la Nouuelle Angleterre: ils ont laissé aux François celles qui tirent au Nort, dont les noms principaux font Miscou, Rigibouctou, & le Cap Breton. Le district de Miscou est le plus peuplé, le mieux disposé, & où il y a plus de Chreftiens: Il comprend les Sauuages de Gaspé, ceux de Miramichy, et ceux de Nepigigouit. Rigibouctou est vne belle riuiere, considerable pour le commerce qu'elle a auec les Sauuages de la Riuière de S. Iean.

Le Cap Breton est vne des premieres Isles qu'on rencontre en venant de France; elle est assez peuplée de Sauuages pour sa grandeur. Monsieur Denis commande la principale habitation que les François ont en ces quartiers-là. Voilà le païs, que nos Peres ont cultiué depuis l'an 1629, & où presentement trauaillent le Pere André Richard, le Pere Martin Lionne & le Pere Jacques Framin

le Pere Iacques Fremin.

Celuy-cy a eu pour partage la coste de Rigibouctou, où il a hyuerné parmy les Sauuages, auec lefquels il a fouffert, outre le mal de terre, la famine, causée par le defaut des neiges, qui font les richesfes des Sauuages, puisque les Originaux, les Caribous, & les autres bestes s'y prennent comme au lacet, quand elles font affez hautes. Mais le Pere ne s'est trouué que trop bien payé des trauaux, qu'il a foufferts dans ces grandes forests, par le Baptesme qu'il a conferé à

vne petite fille malade à l'extremité, qui a receu la fanté dans ces eaux falutaires. Ce ne luy fut pas aussi vne petite consolation, de se voir pressé auec instance par vn paure Sauuage, nommé Redoumanat, de le baptiser, en suite d'vne grace bien fenfible qu'il auoit obtenüe de Dieu depuis peu de temps. Cet homme auoit languy deux ans entiers, accablé de grandes incommoditez, qui luy causoient des douleurs tres-cuisantes par tout le corps, mais particulierement aux iambes. Il s'estoit fait souffler & refouffler par les iongleurs du païs; & aprés avoir laissé tous les sorciers, & vsé tous leurs medicamens, ne fachant plus à qui auoir recours, il s'adressa à Dieu, dont il auoit entendu louer les bontez & les puisfances, & luy dit: Toy qui as tout

fait, on dit que tout t'obeït : ie le croiray, pourueu que mon mal, qui n'a pas voulu écouter la voix de nos Demons, écoute la tienne : s'il t'obeït quand tu le chasseras de mon corps, ie te promets de t'obeïr moy-mesme, & d'aimer la priere. Dieu se plût à cette sorte de prière, & luy rendit vne parfaite santé, dont il est si reconnoissant, qu'il publie partout cette faueur, faisant voir par vn grand changement de sa vie, que fon ame a la meilleure part à ce bien-fait. Il s'est entierement deporté de l'iurognerie, qui est le grand Demon de ces pauures Sauuages, aussi bien que la vengeance, qu'il a domptée par vn acte aussi heroïque qu'il s'en trouue parmy les meilleurs Chrestiens. Car vn iour vne de ses filles, qu'il aimoit vniquement, aiant esté massacrée

deuant ses ieux par vn insolent, le meurtrier estant arresté, tant s'en faut qu'il voulut s'en venger, qu'au contraire il arrefta le bras de ceux qui l'alloient massacrer, disant qu'il s'en rapportoit au Maistre de la vie, puisqu'il apprenoit que c'estoit à luy à prendre vengeance des torts qu'on nous faits. Et de vray, la Iustice diuine ne manqua pas de tirer raison de cet affassinat, aiant permis que ce malheureux fust peu de temps aprés, affaffiné luy-mesme par vn rival, qui aspiroit au mesme mariage que luy. Ce bon homme n'est pas l'vnique, qui a receu du Ciel des faueurs extraordinaires, mais tous ne s'en font pas montrez si reconnoissans.

Vn nommé Capïfto, ancien Capitaine du Cap Breton, fort attaché à fes Superstitions, tomba vn

iour en de tres-violentes conuulfions, pendant lesquelles les Sauuages s'aviserent de mettre sur luy des Images, des Chapelets, & des Croix, dont ils font grande estime s'en seruant contre les infestations des Demons. Cet homme, au plus fort de son mal, s'imagine que quantité de Diables se iettent sur luy, qu'ils le traisnent d'vn costé & d'autre, s'efforcans de l'enleuer. Dans cette angoife il fe faifit d'vne grande Croix plantée à l'entrée de la riuiere, à laquelle il s'attacha fi fort, qu'il fut impossible aux Demons de l'en déprendre. Cette vifion l'a touché; & quoyqu'il demeure encore dans l'infidelité, il ne laisse pas de priser la Foy, & de donner esperance, qu'enfin aprés tant de faueurs que Dieu luy fait, incité d'ailleurs par l'exemple, & par les instances de son frere, qui fut baptisé ce printemps, il rompra les liens, qui le tiennent attaché à son malheur.

Ce frere du Capitaine Capisto, est vn bon viellard, fort aimé des François, aux interests desquels il est fort attaché, & ausquel il a rendu de fignalez services en des fascheux rencontres: il a fait tant d'instances pour estre baptisé, qu'estant remis d'année en année pour eprouver sa constance; enfin le Pere Richard le baptisa, auec sa femme & fa foeur, dans de grands fentimens d'estime, du bonheur aprés lequel il auoit tant soûpiré. Il presfoit que ses enfans eussent part à la mesme faueur; mais ils furent differez iufqu'a l'Automne, pour tirer de plus grandes marques de leurs bonnes resolutions.

Il y a deux ans que les Sauuages de ces costes furent en guerre contre les Esquimaux; c'est vne nation la plus Orientale, & la plus Septentrionale de la Nouuelle France par les 52. degrez de latitude, & les 330. de longitude. C'est merueille comme ces mariniers Sauuages nauigent si loin auec de petites chaloupes, trauersant de grandes étendües de mers, sans boussole, & souent fans la veüe du Soleil, se fiant de leur conduite à leur imagination. Mais la merueille est encore plus grande du costé des Esquimaux, qui font quelquefois le mesme traiet, non pas en chaloupes, mais dans de petits canots, qui font furprenans pour leur structure, & pour leur vistesse: ils ne sont pas faits d'écorce, comme ceux des Algonkins, mais de peau de loups marins, dont

l'abondance est trés-grande chez eux. Ces canots font couverts de ces mesmes peaux: ils laissent au dessus vne ouuerture, qui donne entrée à celuy qui doit nauiger; lequel est tousiours seul en cette gondole: estant assis et placé dans le fond de ce petit batteau de cuir, il ramasse à l'entour de soy la peau qui le couure, & la ferre & la lie si bien, que l'eau n'y peut entrer: logé dans cette bourse, il rame de bord & d'autre d'vn feul auiron, qui a vne passe à chaque bout; mais il rame si adroitement, & fait marcher fi legerement son batteau, qu'il passe les chaloupes qui voguent à la voile: que si ce canot vient à tourner, il n'y a rien à craindre; car comme il eft leger, & rempli d'air enfermé dedans auec la moitié du corps du nautonnier, il se redresse aisement,

& rend fon pilote fain & fauue fur l'eau, pourueu qu'il soit bien lié à fon petit nauire. La nature iointe à la necessité a de grandes induftries. Ces bonnes gens se seruent encore de peaux de loups marins pour bastir leurs maisons, & pour fe faire des habits; car ils fe couurent tous de ces peaux tres-bien passées, dont ils se font des robes faites d'vne mesme façon pour les hommes & pour les femmes. Ils viuent principalement de cariboux, c'est vne espece de sers; de loutres, de loups marins et de molues. Il y a peu de caftors, et peu d'orignaux chez eux. Pendant l'Hyuer ils demeurent fous terre, dans de grandes grottes, où ils font si chaudement, que nonobstant la rigueur du climat ils n'ont besoin de seu que pour la cuifine. Les neiges y sont

fort hautes, & tellement endurcies par le froid, qu'elles portent comme la glace, sans qu'on ait besoin de raquettes pour marcher dessus. Le fer qu'ils trouuent auprés des échaffaux des pescheurs de moluë, leur sert à faire des fers de fleches, & des cousteaux, & des tranches, & pour d'autres ouurages qu'ils aiustent bien eux-mesmes sans forge ny fans marteaux. Ils font de petite taille, de couleur oliuastre; du reste ils sont assez bien faits, ramassez, & grandements forts.

Nos Sauuages furent en guerre vers ces peuples, il y a quelque temps: en aiant furpris & massacré quelques-vns, ils donnerent la vie aux autres, les amenant prisonniers en leur païs, non pour les brûler, ce n'est pas leur coûtume; mais pour les tenir en seruitude,

ou pour leur caffer la teste à l'entrée de leurs bourgades, en signe de triomphe. Entre ces prisonniers vne femme, dont le mary auoit esté tué dans le combat, trouua son bonheur dans sa captiuité; car aiant esté mené au Cap Breton, elle sut rachetée des mains des Sauuages, & enfuite elle fut instruite & baptifée, & maintenant elle vit à la Françoife, en bonne Chreftienne. Il faut confesser que les ressorts de la diuine Prouidence font adorables, d'aller chercher dans le milieu de cette barbarie, vne ame predestinée, & de la choisir parmy tant d'autres, pour la mettre dans le chemin du ciel: & ce qui est encore bien merveilleux, d'auoir tiré cette pauure femme de fon infidelité, pour s'en servir à tirer vn heretique de son erreur. Voicy comme la chose se passa.

Nostre Marguerite (c'est le nom qu'elle eut au Baptesme) estant encore infidelle, se trouuoit par fois infestée des Demons. Vn iour entre autres, elle parut comme forcenée, elle couroit partout auec vne voix horribe, & auec des gestes étranges à la façon des possedez. Les François y accourent, tâchant de la foulager, mais en vain; ses tourmens croissent en sorte, qu'elle se trouua en danger d'estre étouffée. Ils s'auiserent enfin de recourir aux remedes diuins: ils prierent l'Aumofnier, qui seruoit lors l'habitation, de la secourir. Il n'eut pas plustôt ietté de l'eau beniste sur elle, qu'elle s'arresta tout court, & deuint aussi paisible, que si elle se fust éueillée d'vm doux sommeil; elle ne fit que leuer les ieux en haut, puis les tournant vers les assistans: Helas, dit elle, où fuis-ie? d'où viens-ie? vn phantosme de feu me poursuiuoit cruellement; il estoit tout pret de me devorer, quand à vostre prefence ie ne fcay quelle fraieur l'a faifi, & l'a mis en fuite: c'est pour la seconde fois que ie vous suis obligée de la vie: vous me deliurates dernierement de la rage des Sauuages, & maintenant vous me sauuez de la furie des Demons. A cet accident l'interprete qui estoit hérétique, saisi d'étonnement, & admirant la force de l'eau beniste, renonça à l'herefie, & publia par fon abiuration la merueille, dont il auoit esté spectateur.

Si les Demons seruent à conuertir les Sauuages, & les Sauuages à reduire les heretiques; que ne deuons-nous pas esperer du secours des Anges tutelaires de ces contrées

notam-

notamment depuis que ces esprits bienheureux y ont amené vn Homme Angelique, ie veux dire Monseigneur l'Euesque de Petrée, qui en passant dans les limites de nostre Acadie, du costé de Gaspé, a donné le Sacrement de Confirmation a 140. personnes, qui iamais peut-estre n'auroient receu cette benediction, si ce braue prelat ne les fust venu chercher en ce bout du monde, qui commence d'estre inquieté par la terreur des Iroquois, qui ferment la porte au Salut d'vne infinité de nations, qui tendent les bras à l'Evangile, & qu'on ne peut leur porter, fi ces mutins ne font domptez. Ie me recommande, & tous ces peuples, aux Saints Sacrifices de V. R. & aux prieres de tous ceux qui aiment la conuerfion des pauures Sauuages.

A. Kebec ce 16. d'Ott. 1659. FIN.

Extrait du Privilege du Roy.

PAr grace et priuilege du Roy il est permis à Sebastien Cramois y Marchand Libraire Juré en l'Vniuerfité de Paris, Imprimeur ordinaire du Roy & de la Reine, Directeur de l'Imprimerie Royale du Louure, & ancien Efchevin de Paris, d'imprimer ou faire imprimer, vendre & debiter un liure intitulé, Lettres enuoyées de la Nouvelle France au R.P. Iacques Renault Provincialde la Compagnie de Iesus, en la Province de France, & c. & ce pendant le temps & espace de dix années confecutives auec defense à tous Libraires, Imprimeurs, & autres, d'imprimer ou faire imprimer le dit Liure, fous pretexte de deguifement ou changement, qu'ils y pourroient faire, aux peines portées par le dit Priuilege. Donné à Paris le 26. Decembre 1660. Signé, Par le Roy en fon Confeil.

MABOVL.

Permission du R. P. Provincial.

Ous Iacques Renault, Provincial de la Compagnie de Iesus en la Prouince de France, auons accordé pour l'auenir au Sieur Sebastien Cramoisy, Marchand Libraire, Imprimeur ordinaire du Roy&de la Reine, Directeur de l'Imprimerie Royale du Louure, & ancien Efcheuin de cette ville de Paris, l'impression des Relations de la Nouuelle France. Donné à Paris au mois de Decembre 1658. Signé

IACQUES RENAULT.



Imprimé selon un MS copié de la Relation jadis appartenante à la Bibliothèque Parlementaire de Canada et détruite par l'incendie de 1854, et de laquelle il ne reste d'autre copie que l'on connaisse.











